

<sup>17</sup>  
L E T T R E

<sup>3</sup>  
D E

MONSIEVR LE DVC  
DE MAYENNE,

AV ROY.

*Avec la Responſe à icelle par ſa  
Majeſté.*



A PARIS.

Chez EDME MARTIN, rue S. Iacques,  
à l'enſeigne de la Corne de Cerf.

---

M. D C. XVII.

*Avec permiffion.*

C E T T R E

MONSIEUR LE DUC

DE LANTHES



LE ROI

Sur le Rapport de son

Majesté

CHATELAIN MARC  
Sous-Secrétaire d'Etat

LE DUC

LE ROI



**LETTRE DE MONSIEVR**  
*le Duc de Mayenne au Roy.*



I R E,

I'enuoye monsieur le Baron de Linieres à vostre Majesté, pour la supplier tres-humblement de vouloir ouïr mes iustes calamitez, esperant qu'elle me fera l'honneur de les recevoir fauorablement, & que sa bonté sera touchée du iuste ressentiment que i'ay des violentes entreprises faictes sur ma vie, & les places de mon Gouuernement, données à feu mon pere, non pour satisfaction ny recompense, mais pour marque & gage honorable de sa fidelité & conduite, estimée par tous les bons François dans les guerres ciuiles, ayant conserué vostre Estat en son entier contre les desseins estrangers, sans en souffrir aucun desmembrement.

I'espere d'auantage, Sire, que vostre Ma-




jesté par sa bonté & prudence, nécessaire  
 en telle occasion, feta faire chastiment ex-  
 emplaire de celuy ou ceux qui ont mes-  
 chamment, à prix d'argent, tramé & con-  
 duit ce mauuais dessein, mesmes de celuy  
 qui vouloit en estre l'executeur. Ce proce-  
 der, Sire de raurir la vie de vos suieçts, & de  
 ceux qui ont l'honneur de tenir des pre-  
 miers rangs & principales charges de vo-  
 stre Royaume, qui ne tesmoignent par  
 leurs paroles, actions & deportemens, que  
 toute obeyssance, qui ne respirent que vo-  
 stre seruice particulier, & le bien de vostre  
 Estat, qui volontairement pour ceder au  
 temps & aux conseils violens, se sont vou-  
 lus bannir de la France, acceptans les pro-  
 positiōs qui leur ont esté faiçtes des voya-  
 ges aux pays estrangers, qui pour le res-  
 pect qu'ils portent à vos commandemens,  
 ont oublié toutes iniures & calomnies  
 qu'ils ont receu de vos Ministres; bref, qui  
 ne cherchent que du repos en leur vie dās  
 l'innocence de leurs actions, ne se peut  
 nommer autrement qu'une persecution  
 insupportable & inouiye dans vostre Roy-  
 aume, qui passe plus auant que la vengean-  
 ce que l'on peut rechercher contre les  
 particuliers. A quoy ie supplie tres-hum-

blement vostre Majesté d'auoir quelque esgard, puis que c'est le deuoir de ceux qui sont interessez en la conseruation de vostre personne , & de vostre Estat, de vous en donner aduis ; & ma plainte estant appuyée des loix diuines & humaines, m'a faict esperer que vostre Majesté la receura avecques la mesme bonté qu'elle a accoustumé de tesmoigner à tous ses sujets en leurs iustes requestes. Et qu'elle me fera l'honneur de croire qu'aucunes sortes de persecutions ne me pourront iamais faire changer la resolution que i'ay prise de tesmoigner par toutes mes actions le tres-humble seruice que ie dois à vostre Majesté. A quoy ie n'espargneray mon sang & ma vie, croyant aussi que vostre Majesté aura plus agreable de la voir finir de ceste sorte , que par de si mauuais moyens. Estant Sire, de vostre Majesté tres-humble, tres-obeyssant & tres-fidelle seruiteur, & subiet,

M A Y E N N E.

De Soissons ce 11. Ianuier 1617.













LETTRE DV ROY  
à Monsieur le Duc de Mayenne.

**M** O N Cousin, i'ay veu par vostre lettre de l'vnziesme de ce mois, & entendu par le sieur Baron de Linieres la plainte que vous faites de ce qu'on a voulu attenter à vostre vie. Sur quoy ie vous diray que la conseruation de mes subiets m'est si chere, & particulierement de ceux qui tiennent en mon Royaume le rang que vous y auez, que si vous contribuez autant de vostre part, comme ie feray de la mienne, pour vous faire auoir raison de ce crime, vous en receurez sans doute le contentement que vous en pouuez esperer. Vous le croirez aisément, ie m'assure, quand vous verrez que mon Parlement ( qui rend la Iustice à tout le monde, & a l'interest des Pairs en singuliere recommandation ) en prend

cognoissance : Et ce avec tant de soin , qu'il a desia ordonné que le procez sera fait & parfait à l'accusé, au lieu où vous estes , & qu'estant iugé, il luy soit amené, afin que s'il est trouué coupable de ce dont il est chargé, il reçoive la peine & le supplice deu à l'enormité d'une si detestable entreprise. Ce qui sera indubitablement si vous le voulez , rien ne l'en pouvant garentir que sa fuite, qu'il vous est aisé d'empescher , puis qu'il est en vos mains , & qu'il n'y a chose plus facile que de le rendre seurement en ceste ville, où non seulement ie le feray chastier comme il merite; mais en outre ceux qui se trouveront l'auoir suscité à vn si pernicieux dessein : la raison voulant que les auteurs des crimes portent au moins la mesme peine que ceux qui les doiuent executer.

Ie ne souffriray iamais qu'en mon Estat on pratique impunément telles meschancetez. Ie permettray aussi peu qu'on entreprenne sur les places que me gardent mes subiets & mes seruiteurs que sur leurs vies. C'est pourquoy demeurant dans les bornes de vostre deuoir , vous pouuez vous asseurer que rien ne vous conseruera plus seurement les villes (qui ont autrefois

esté cōsignées entre les mains de feu mon Cousin le Duc de Mayenne vostre Pere ) que mon autorité.

Ie ne responds point à la façon par laquelle vous me tesmoignez qu'il les a eues, l'integrité de ses dernieres actions m'obligeât de perdre la memoire des premieres qu'il a beaucoup de fois cōdānées luy mesme, le cours de sa vie ayant esté tel depuis la fin des troubles de la Ligue, que si vn Souuerain peut deuoir quelque chose à son subiet, ie confesse luy estre redeuable, particulièrement en consideration de ses dernieres paroles, par lesquelles il vous recommanda & commanda plusieurs fois de viure & mourir en mon obeyssance.

Vous vous plaignez de la violence de ceux à qui ie donne part au maniemment de mes affaires: ie m'en estonne grandement, puis qu'il n'y a personne qui ne doieue recognoistre qu'en suiuant leurs aduis, i'ay iusques icy donné à mes subiets tant de subiet d'actions de graces pour ma clemence, qu'à peine en trouuera-on vn seul en mon Royaume qui avec quelque apparence se puisse plaindre de ma rigueur, que ie puis dire n'auoir iamais exercée que contre moy-mesme, ayant esté trop in-



dulgent à l'endroit de ceux enuers qui  
selon Dieu & selon le monde ie pouuois  
vser de seuerité.

Vous me mandez que pour ceder au  
temps, vous auez voulu vous bannir de  
mon Royaume, acceptât les propositions  
qu'on vous auoit faictes d'en sortir. Sur  
cela ie n'ay rien à vous dire, sinon que l'af-  
fection que i'ay pour mes subiets, & parti-  
culierement pour ceux qui sont de vostre  
qualité, me les faisât plus desirer aupres de  
moy qu'en aucun autre lieu que ce puisse  
estre, ie ne vous eusse iamais permis le  
voyage d'ôt vous parlez, s'il ne m'eust esté  
proposé, côme vous sçauiez, à vostre instâte  
prière & supplication, & si ie n'eusse estimé  
vous rendre vn tesmoignage signalé de  
ma bonne volonté, en vous l'accordant.

Au reste, ie vous prie de croire que les  
persecutions ( pour vser de vos termes )  
ne seront iamais telles en cet Estat qu'elles  
en puissent chasser personne; me sentant  
par la grace de Dieu maintenant assez fort,  
pour executer la resolution que i'ay prise  
de ne souffrir qu'aucun de mes subiets en  
persecute d'autres: & faisant estat de viure  
auec tant de bonté, que ie ne doute point  
que chacun à mon exemple ne se tienne

n son deuoir, m'exemptât par ce moyen  
l'auoir recours à ma puissance pour les y  
contraindre.

Les tesmoignages que vous me rendez  
par vostre lettre de desirer chercher vostre  
repos dans l'innocence de vos actions, me  
resioüyroient grandement, si vos effets ne  
sembloient contreuenir à vos paroles : ne  
pouuant conceuoir que l'innocence puisse  
côpatir avec les intelligences & practiques  
qui sont tous les iours entre vous & ceux  
qui veulēt troubler le repos de mon Estat :  
avec les leuées de gens de guerre que vous  
auez faites depuis peu pour grossir vos  
garnisons , non seulement sans ma per-  
mission, mais contre ma volonté : avec le  
refus de receuoir mon Lieutenant general  
de Soissons en la ville où sa charge l'oblige  
de resider , le bannissant de sa demeure  
au mespris de mon autorité, sans autre  
subiet que celuy de l'affection qu'il a au  
bien de mon seruice , & sans auoir esgard  
aux prieres & commandemens que ie  
vous ay faicts plusieurs fois de le restablir.

Ie ne sçay pas ce que vous tiendrez  
pour crime, si vous appelez telles actions  
innocentes ? Il n'y a personne despoüillé  
d'intrest & de passion qui ne les iuge du

tout contraires aux loix diuines & humaines, que ie feray tousiours aussi soigneux d'obseruer, comme de les faire garder aux autres.

C'est ce qui me fait souhaitter que vous vous teniez veritablement dans les termes des protestations que vous me faites, afin que ie puisse sans peine maintenir la paix en cet Estat, pour la continuation de laquelle ie suis resolu d'employer mon propre sang, tenant à bonheur & à gloire de la conseruer à mon peuple, au mesme prix que le feu Roy, mon tres-honoré seigneur & pere, luy a acquise.

Par là vous cognoistrez la sincerité de mes intentions, que ie vous coniure de seconder de si bons effets, que vous puissiez vn iour, non auoir regret de m'auoir troublé aux desseins aduantageux que j'ay pour ce Royaume, mais vous preualoir de n'auoir pas peu contribué pour les faire réussir. Je prie Dieu, mon Cousin, qu'il vous en face la grace, & vous tienne en sa sainte garde. Escrit à Paris, ce dix-septiesme Ianuier 1617.

LOVIS.

DE RICHELIEV.





